



kal komp

221351

Mag. St. Dr.

G

*[Faint blue ink signature]*







EPISTOLA  
EXIMIÆ FACULTATIS  
THEOLOGICÆ  
UNIVERSITATIS PARISIENSIS,  
MAGNI COLLEGII SORBONÆ,

AD EXIMIAM FACULTATEM  
UNIVERSITATIS PRAGENSIS,

In Causa Bullæ UNIGENITUS.

221357  
III

DECANUS ET FACULTAS  
THEOLOGORUM PARISIENSIIUM,

Celeberrimæ Studii Pragensis Universitati,  
Salutem plurimam in Eo,

*Qui convertit luctum nostrum in gaudium.*



Iuxta monitum Sapientis *curam habere debeamus de bono nomine*, tum maximè, cùm famæ nostræ aspersam labem novimus, in iis, quæ Religionis, & Fidei Nostræ integritatem spectant, in quibus, ut ait D. Hieronymus, *nefas est quemquam esse patientem*. Cùm igitur ex iis, quæ statim ab obitu Ludovici XIV. Invictissimi Galliarum Regis in nostra Theologica Parisiensi Facultate adversus Constitutionem UNIGE-

NITUS, à nonnullis turbulentis tentata sunt, iste rumor infaustus de Parisiensibus Theologis per universum Orbem Catholicum increbuerit; Decretum nempe, quod anno 1714. pro acceptanda, & observanda præfata *Constitutione* SS. memoriæ CLEMENTIS PAPÆ XI. emisserant, subinde declaratum fuisse nullum, falsum, & adulterinum (quod tamen invictissimis argumentis ostendimus in Actis nostris esse falsissimum) imò communi Magistrorum



suffragio, renitentibus admodum paucis, interjectam fuisse ad *futurum Generale Concilium* scandalosam provocationem, uno verbo: adversus *Decretum Apostolicum* ab Episcopis acceptatum, & promulgatum, insurrexisse nihilominus totam Facultatem nostram, atque indè vulgò traduceremur Parisienses Theologi, ac si per stupendam animorum conversionem à priscis Majorum suorum moribus, & ab *Antiqua*, quæ hucusque in *Ordine suo* doctrina viguerat, planè recessissent, spretæque *docentis Ecclesiæ Autoritate*, quam *qui non audit, tanquam Ethnicus & Publicanus*, ipso pronuntiante Christo Domino, *haberi debet*, se solos aliter docentes esse audiendos jactitarent, eorum ritu scilicet, qui, ut soli sapere videantur, Cælum ipsum vituperant, & rerum novarum amatores, *quorum os abundat malitiâ*, sparsis undequaque famosis suis libellis, tanquam totidem funestis flabellis, falsum hunc rumorem augere non cessarent, quemadmodum hodierna die nec adhuc desinunt, adeò, ut in istis florentissimis Academiis Catholicis nemo ferme foret, qui attendendo ad ea, quæ de nobis sinistra fama renuntiante passim circumferebantur, & ex altera parte revocando in memoriam suam felicem præteritorum temporum conditionem nostram, in hæc verba, luctu ac mœrore percitus, non statim erumperet: *Hæcne est illa perfecti decoris Theologica Parisiensis Facultas, gaudium olim universæ terræ? quomodo obscuratum est aurum? mutatus est color ejus optimus?* Ad tot tantæque reformanda mala duximus strenuè ac fortiter esse allaborandum. Ut autem id præstaremus feliciter, intelleximus, non satis, sufficienterque consultum iri famæ nostri Nominis, si, quæ per summum nefas nebulosis temporibus inserta fuerant in Commentariis nostris, & quæ evulgata falso rumori ansam, aliquòdque fundamentum hætenus præbuerant, planè, penitusque apud nos rescinderentur, & iis substituerentur meliora; sed insuper oportere ad amoliendam hanc labem, Acta, quæcunque à nobis ea de re sancirentur, publici juris fierent, ut quocunque ad dedecus, & opprobrium nostrum, rerum malè gestarum iniquitas accesserat, ibi pariter ad resarciendum honorem nostrum, damni fortiter, ac feliciter reparati notitia perveniret, nec minùs hodie ad propulsandam gravem injuriam diffunderetur factis certissimis *cognitio Veritatis*, quàm ad conflandam turpem calumniam, se se pravis artibus diffuderat *antea propagatio falsitatis*.

Quapropter, quæ duo erant æquè necessaria, statim atque potuimus, eodem ferme momento præstitimus; alterum, in quo agebatur de *statu nostro*, ut verbis utamur Sancti Augustini, *necessarium erat nobis*; alterum: quod erat de *recuperanda fama Nominis nostri*, *necessarium aliis*; Utrumque debebamus Æquitati, Honori nostro, Religioni. Primò itaque, ubi se se fausta obtulit occasio, cui jam præstolabamur impatientes moræ, emendavimus, quæ jam dudum debuissent emendari. Decretum latum anno 1714. suæ, ut par erat, sinceritati restituimus, & Autoritati, atque ut nihil deesset opere in tanto, & omnibus, quæ occurri possent, incommodis consulere-mus, nova sanctione, eaque priore Authentica magis, ac solemniori, Facultas Nostra declaravit die 15. *Decembris* ultimi in suis Generalibus Comitibus apud Collegium Sorbonæ congregata, amplecti se de novo Constitutionem UNIGENITUS, tanquam *Dogmaticum* Universalis Ecclesiæ *Judicium*, cui refragari nefas, cui non obsequi, nihil aliud est, quàm velle partem habere cum iis, qui deforis sunt, nec ad Ecclesiam ulteriùs pertinent.

Adhi-



Adhibuimus cautionem, nè quid huic simile, quod evenerat, deinceps contingeret, neque ad Gradus nostros Theologicos admitterentur, nisi de quorum constaret apud nos fidei sinceritate, & obsequio, cæteris, quæ expendi solent, non neglectis. Hoc bene, ac rectè, sapienterque factum vobis profectò Sapientissimi Magistri videbitur, & idem illud valde fuisse non opportunum duntaxat, sed planè necessarium judicabunt, quotquot sunt æqui rerum Æstimatores; neque enim sufficit præteritis, aut præsentibus domesticis malis attulisse remedium; verùm prudentiæ est imposterum prospicere, ac providere. Aliud supererat non necessarium minùs, à quo duxit præsens epistola, quod similiter non censuimus omittendum, nempe ut non solùm typis ad usum nostrum mandarentur Acta nostra, sed etiam eorum exemplaria per Orbem Catholicum affatim spargerentur, & lata eam in rem expressa conclusione voluimus ad insigniores Academias, quarum Catholica Fides *bonus est odor Christi* in Ecclesia, quantoque nomine nostro mitterentur; nec dubitamus, quin pro vestra erga Ordinem nostrum propensa voluntate, ad aspectum eorum, quæ favente cælo novissimis istis temporibus feliciter gessimus, non plurimum gaudeatis in Domino, nobisque velitis ex animo gratulari.

Accedit ad istud bonum, quod à se magnum est, *descendens à Patre luminum, à quo fluit, quodcunque donum est optimum*, quòd, ex quo prodiiit Decretum novum die 15. Decembris ultimi, sexcenti & amplius numero Magistri, quos officiorum necessitas procul ab Urbe, & Comitibus nostris diffitos retinet, scriptis Eximiis epistolis huic applaudere gestiant, suæque suffragia nostris adjungere suffragiis gloriantur, & singulis diebus accedant ad illud roborandum Decretum, ex variis Orbis plagis certissima testimonia non inferiora prioribus; adeò, ut exceptis adhuc nonnullis numero paucis de sua nuditate confusis, qui suis privatis opinionibus abrepti à cæteris dissident, atque idcirco tanquam viri turbulenti jussi sunt à Comitibus nostris abstinere, affirmare meritò jam possimus, utendo verbis Eutychii Constantinopolitani in sua Nomine Concilii ad Vigilium Papam Epistola: *submota confusione discordiæ, pacem reformasse DEum in Ordine nostro, & collectos in unum Magistros, unum idemque sapere in recta Fidei confessione*, quod sanè Catholicè sentientibus gratissimum esse debet, & multum habet in se non mediocris solatii. Quid inde porrò his acceptis nuntiis eveniet, Sapientissimi Patres ac Magistri? Illud certè, quod nostræ in præsentiarum gloriæ plurimum interesse profiteamur: quæ infaustæ de Nomine nostro, fortè apud Vos etiam prævaluerant, suspensiones delebuntur, redibit pristinus favor, reviviscet præclara, quæ apud Vos, ut alibi, floruerat olim, nostri Nominis existimatio.

Docet S. Augustinus lib. Confess. *cavendas omnes suspensiones*, & in antecessum studendum, nè fingatur de nobis, quidquid fingi potest, aut dici; quantò magis, ubi tam noxiæ suspensiones obtinuerunt, nec defuit, proh dolor! aliquod fundamentum, ut obtinerent. His ità positis nullus est in nostris evulgandis operibus superbiæ typus metuendus, nulla jactantia, ostentatio nulla, quia vera inest loquendi, ac scribendi, & quæ scripta sunt, evulgandi necessitas. Scimus quædam esse opera bona, quæ, nè fiant coram hominibus, sed in abscondito, Divina nobis præcipit in Evangelio Christi Domini Sapientia, ad quod attendens præceptum S. Basilii,



lius, rectè Christianos admonet, *inane gloriâ esse fugiendam, quam dulcem bonarum operum spoliatricem* non minùs verè, quàm eleganter nuncupat. Verùm sunt alia tamen opera bona, quæ jubente eodem novæ Legis Authore Christo, *lucere debent coram hominibus, ut illa videant, & glorificent Patrem, qui in cælis est.* Non sunt hæc duo inter se pugnancia, si attendamus ad diversam operum indolem, & eorum naturam, de quibus sermo est, nec non ad conditionem temporum, in quibus nunc versamur, & sumus positi; maximè verò, si quæ manifesta sunt, & evulgantur, eo bono ac recto fine prodeant, quo Acta nostra typis recèns edita ad Celeberrimam Academiam Vestram mittere satagimus. Nostrium ergo non improbabitur Consilium, Magistri Sapientissimi, ex quo mentem nostram noveritis; vehementer cupimus in Amicitiam redire Vestram, si forsan ab illa excidimus; nihil magis cordi est, quàm Academiæ Vestræ, quæ cæteras inter multiplici titulo eminet, antiqui amoris vinculo, & Catholicæ Fidei communione consociari. Unde confidimus futurum, ut munusculum illud nostrum, quale est, ingratum Vobis non sit; erit certè in signum ære perennius, & pignus Authenticum illius observantiæ singularis, quâ Vos, Illustrissimùmque Ordinem Vestrum impensè colimus, ac veneramur.

Valete Sapientissimi Theologi, *crescentes semper in Scientia DEI, veritatem facientes in charitate.* Coniunctis viribus confortemur in Domino, & in potentia virtutis ejus ad destruendam omnem altitudinem extollentem se se adversus scientiam DEI; Verbum vitæ contineamus ad consummationem Sanctorum, in opus ministerii, & ædificationem Corporis Christi.

*Pax Vobis Fratribus, & Charitas cum Fide à DEO Patre, & Domino JESU Christo. Gratia cum omnibus, qui diligunt Dominum Nostrium JESUM Christum in incorruptione. Amen.*

Datum Parisiis in Comitibus Generalibus Kalendis Septembris, Anno reparatæ Salutis humanæ supra Millesimum Septingentesimo Trigesimo.

De Romigny  
Syndicus.

De Mandato D. Decani, & Magistrorum  
Sacre Facultatis Parisiensis.

Herissant  
Scriba.



RESPONSORIA  
FACULTATIS THEOLOGICÆ  
UNIVERSITATIS PRAGENSIS.

DECANUS & FACULTAS  
Theologorum Pragensium,  
Celeberrimæ, & Antiquissimæ Studii Parisiensis  
UNIVERSITATI,

Salutem plurimam in Domino,

*Et ab*

UNIGENITO  
DEI FILIO

PERENNEM BENEDICTIO-  
NEM, & SEMPITERNAM  
PROSPERITATEM.



Uòd in conjunctionem gaudii, &  
in partem de plenitudine consolationis, &  
exultationis suæ, quam sapientissimi consilii sen-  
tentiâ, & æquissimi Judicii Decreto pro Gloria  
UNIGENITI DEI FILII congregata in unum,  
Sacra Facultas concepit, Nos evocare libuerit,  
Nobiscúmque uberrimos Sanctæ Lætitiæ fructus  
in Spiritu Sancto conceptos, in veritate, atque charitate partos com-  
municare placuerit, grandis exultationis Nostræ accrevit portio, inex-  
plica-



plicabilis exhilaratio, ingensque in Nos propensi Sacrae Facultatis affectus aestimatio, & veneratio, & utriusque augmentum excrevit; Unanimiter profusis gaudiis ex abundantia cordis exhilarati pariter in consummatione gaudii congaudemus: *Ecce quam bonum, & jucundum in Domo Divinae Sapientiae habitare in unum*, in Charitate congregari, & consentire in Veritate; Impensè gratulamur ad unum omnes Sacris Comitiis, super quæ Spiritus Veritatis, & Charitatis ita descendit, ut dissensionem nullus relinqueretur locus, neque ullum foret votum; sed sola Pax, & Tranquillitas recto intellectu, & bono affectu colligeret calculos, & suffragia, quibus Sapientissimi juxta ac Sacerrimi Ordinis æquissimum Arbitrium probatis, & approbatis, sententiam ferret. Non satis dilaudare valemus ardentem Sacrae Facultatis Zelum, neque sufficienter applaudere magnanimæ Declarationi, justissimæ, & sapientissimæ Ideæ, atque irrefragabilis Veritatis exemplo, quæ novit pretiosum à vili discernere, atque ita ex Prophetico testimonio, quasi *Os Divinae Sapientiae fieri*, quod tam solitam argumentandi vim complectitur, & energiam; ut potens sit irritare, quæ contraria: roborare, atque firmare, quæ stabilienda: & quæ firmata sunt, porro confirmare, & ab omni adverso insultu generosè, & gloriosè tutari. Magno nempe Sacerrimus Ordo Sapientiae apparatu est instructus, ut potenti eloquio, literariisque monumentis nunquam non capax sit falsas subtilitates enervandi, & evertendi, quibus APOSTOLICÆ SEDIS CONSTITUTIO à malignis conatibus per temporis funesti Assertores, & Scriptores tentata fuit. Probandus etenim spiritus est non minùs Veritatis, quàm Charitatis, utrùm genuinus sit, nè sub specie Veritatis intellectus erret, & Voluntas decipiatur; Amplissimùmque Literatæ Virtutis in probata Veritate, & Charitate præconium est; hæc namque mali genii est impostura, ut assertis suis perfidam conciliet fidem, hæc rectæ rationi non solum non esse dissona, verùm Ipsi Divinae Sapientiae consona jactitet; atque eoque temeritate sua procedit, ut velut Authoritate Fidei nixa, mala quantumvis fide relatis Divinis testimoniis, & majori perversitate in argumentum deductis, roborare, divulgareque ausit, & sub specie, quasi pervetustum, & authenticum, quod prorsus novellum, & spurium, alleget, invalescentèque lapsu temporum erratico lumine Cathedris, & falsis persuasionibus Aris illudat, Maternaque Ecclesiæ viscera in avulsione Membrorum à Capite dilaceret, & Unitatem falsitate, & iniquitate discindendo, Veritatem, & Charitatem invadat, ut his duabus Virtutibus, quæ vitam fovent cæterorum, eliminatis, mendacium cum odio concatenet; neque perversitate judicii proprii contenta iniquitas sibi mentiens, nè mentiri quoque censeatur aliis, solique sibi videatur sapere, consequenter desipere, falsum loquens testimonium, facit causam communem, & errorem suum sententiam esse Præclarorum Virorum, & Sapientissimorum Magistrorum Doctrinam impudenter adstruit, ita perversè sua minuens, & obvelans errata.

Verùm: non est consilium contra Divinum Spiritum Veritatis Sacrae Facultati providè assistentem, Quæ sapientissima perspicacitate,



cacitate , & illustri prudentia fraudes errantium , & fraudulentorum errores detexit , & de crimine falsi magnæ Authoritatis argumentis , & solidis sinceræ Veritatis Literatis momumentis convincit ; Sapientissimi enim deputati Magistri ad stuporem attoniti primùm ad impa-ctas Sacræ Facultati calumnias hæserunt , quando inspectis erroneis commentariis intuiti sunt decoloratam , ac deformem factam Sacræ Facultatis Doctrinam : *Ecclesiæ Capitis conclamatum esse Authoritatem , unum Concilium Generale velut supremum Iudicem Controversiarum habitum , Læsam Summi Pontificis , & Episcoporum Sacram Dignitatem , Presbyteros simplices Episcopis esse equatos , Iudicium in res fidei ab ipsis etiam Laicis esse vindicatum , & usurpatum ;* attamen tantas tam Illustri Sacræ Facultati aspersas tenebras iustissimo Zelo non patiens , Clarissima Veritatis Luce prorsus oppositum se sentire corde , & animo , calami , & vivæ vocis firmamentis , etiam jurejurando hoc asserere parata , est contestata , firmissimâ mentis sententiâ Sacra Facultas declarans : Se **CONSTITUTIONEM UNIGENITUS** tanquam *Judicium , & Decretum Dogmaticum Universalis Ecclesiæ* simpliciter secundum tenorem assertæ Constitutionis , secundum mentem , & sententiam Sedis Apostolicæ ad supremum à primo apicem recipere , hanc laudare , & approbare in omnibus , jubere , ut inferatur suis Commentariis , atque etiam mandare typis , & Latino , & Patrio sermone divulgare , statueréque , ut recitetur in Cathedris , neque ullus Sacræ Facultatis ullum obtineat gradum Dignitatis , qui Eidem *Sacræ Constitutioni* se firmiter assentiri plenam fidem non faciat , & Sacramentum dicat.

Non tamen hæc ità intelligimus , quasi verò data Declaratio tacita prioris sententiæ foret revocatio ; sed esse sapientem confirmationem sentimus , quando jam dudum , & multis abhinc lapsis annis Sancta hæc Constitutio à Sacra Facultate plena fide fuit recepta , ità enim inter sua Decreta sub Num. 2. & 3. Sacra Facultas Sanctum habet : *Attendendo ad gravissima rationum momenta , quibus abunde constat Decretum Sacri Ordinis Latum Diebus Quinta & Decima Martii 1714. verum esse , ac genuinum , illud iterum & de novo suum facit , & agnoscit immeritò prorsus fuisse declaratum falsum , adulterinum , & commentitium ;* atque idcirco vult , ut nulla habita ratione *Lituræ factæ 4. Januarii 1716. quantumvis per nonnullas Conclusiones probata videatur , illud Decretum suum omne robur habeat , & hac præsentis Conclusionis in integrum restitutum censeatur , nec non , quæcunque contra ipsum tentata subinde sunt , penitus deleantur , eradantur , adhibita mentione ad marginem præsentis Conclusionis ;* & notanter , quod sequitur , respeximus Decretum : *Constitutionem Sanctissimi Domini Nostri CLEMENSIS Papæ XI. datam Die 8 Septembris Anno 1713. quæ incipit : UNIGENITUS DEI FILIUS* summa cum reverentia , & integro cordis , & animi obsequio , iterum & de novo amplectitur tanquam Dogmaticum Ecclesiæ Universalis iudicium. Atque ut clariùs finistrum obscurioris famæ Sacra immutet Facultas , & de se avertat iudicium , sapientissima prosequitur Decreta : *Provocationem , seu Appellationem , quæ legitur , & circumfertur sub Nomine Sacræ Facultatis à prædicta Constitutione UNI-*

GE-



GENITUS ad futurum Generale Concilium Die 5. Martii Anni 1717. interjecta præfenti Conclusionem ; quantum opus est , revocat , pro nulla haberi jubet , cassat , & antiquat , atque à suis Commentariis vult , & imperat eradi , & expungi , nec non alios omnes actus prædictæ Constitutioni adversantes.

Quæ singula universim ut publici Juris fiant , Sapientissimum Sacræ Facultatis est desiderium ; amant enim latere , qui male agunt , ea verò , quæ optima sunt , latissimè diffundi , æquum est ; proinde Gloriosa hæc Comitia non sunt tam deliberantium , quàm in Unitatem Fidei pro plenitudine Dogmaticæ Veritatis sanctè conjuratorum Sacra Congregatio , ut , si qui forent adhucdum diffidentes , eos dissertatione pacifica Veritatis Authoritati reconciliet ; Officia enim Magistri Fidelium Magnus Sapientiâ , & sanctitate Ecclesiæ Doctor describens Aurelius Augustinus , ad tria potissimum reducit capita , videlicet : *Ut tollat errorem , inferat Veritatem , & nutriat Charitatem.* Neque enim satis est luminosam possidere scientiam , verum etiam ingenii dexteritate ornatam esse oportet ; ità , ut Veritatem , quam docet jam illustratam , aliorum intellectui quoque reddat conspicuam , cum enim (ut Idem Divus observat Hipponensis Præsul) Doctori laborandum sit ad dissipandas ignorantiae tenebras , lucem asserendo mentibus , *ut appareat , quod latebat* : exhibenda pulchritudo , & suavitas Virtutis , ut ametur , atque austeritate sublata , quæ Illius desiderium , & spem in animis hominum retrahebat , tam scitè insinuare , ut in Ejus amorem prona invitetur voluntas ; *ut libeat , quod horrebat.* Quia tamen persæpe ignavia mortalium utut in aliis ardentia , & prona sufflaminat corda , ut viribus amissis bonum cognitum , quod quidem amant , minimè tamen inquirent , & amplectantur , ideo generosum robur illis infundendum est , quo ad vincendum , quidquid arduum in exercitio virtutis occurrit , animentur , & fiat , quod pigebat.

Atque ità nihil dedecoris Sapientissimo accedit Ordini , nihil omnino labis Sacræ aspergit Facultati , quòd nonnulli à tanta sint alieni sapientia , ut dissentiant ; cum Veritas , & Virtus in suis principiis tam solidè sit fundata , ut etiam aliorum errore , ac vitio non cesset esse laudabilis , quando hoc , quod commendabile est , ex adverso illaudabili amplius , & consummatius illucescit ; neque tamen , ex hoc cogitamus dissidentibus nonnullis exaggerare , quòd erroneum est , sed invitare , ut Sacræ Facultatis sapientissimæ sententiæ consentiant ; non erit ignominiae errantes respicere , dissentientesque consentire Veritati , sed magnæ Gloriæ ; quòd & ipsum dispari licet casu , magnum Ecclesiæ Lumen comprobatur Augustinus , qui dubium Erudito reliquit Orbi ; utrùm Major fuerit in sublimitate , in Libris sapientissimis toti commendatus , & celebratus Orbi , an Gloriosior in humilitate , in Libris Retractationum ? Attamen lugenda , & nimis quàm lugenda fors est , qui à Sapien-



Sapientissimis Magistris se avellunt , sanæ Doctrinæ , & irrefragabili Veritati , atque Canonizatæ Authoritati dissentientes , nunquam de vera Theologica hi fuerunt Sapiaientia , sed esse apparebant ; ut de aliis spiritui Veritatis dissonis Magnum Galliæ Nomen Mellifluus Doctor suam prompsit sententiam : *à nobis abierunt , quia non fuerunt de nobis* ; ità nimirum aberrant , qui nimium lucis suæ ingenio præfisi , dilucidæ obscuritati Fidei , quæ magnum cæteroquin rectè agendorum lumen est , humiliter captivantes intellectum in obsequium infallibilis Magistræ Veritatis , se non submittunt ; atque hinc Magnò Veritatis videre coguntur dispendiò , lumen suum tenebris involutum esse , non attendentes Evangelicum Documentum , sibi datum in cautelam : *Vide ergo , nè lumen , quod in te est , tenebræ sint* ; *simplici* nempe hi destituuntur oculò à Patre Luminum illustratò , & volentes nimium esse perspicaces , impingunt , & in multis offendunt , libertatque suæ , quam nimis liberè tueri meditabantur , præjudicant , quando etiam libertatem conscientie hæretica pravitas obtrudit contra legis vigorem , quasi verò ad commendandam libertatis immunitatem , necessum foret inducere licentiam quidlibet audendi.

Ex quibus facile liquet Sapientissimi Magistri , quis de Sacro Vestro Ordine Sacræ Facultati Theologicæ , & Universitati Carolo - Ferdinandæ Pragensi sit sensus , & sententia , patètque ex declaratione animi Nostri , utrùm Gloriosæ Famæ Magnorum Magistrorum Sapientissimæ Sorbonæ , quod submetuebatur , labe cuiusdam diffamationis sit præjudicatum ; nunquam in Animum Nostrum ità induci valuit rumor etiam literariis monumentis commissus , ultro , citroque divulgatus , qui solemnem in Sorbona volebat esse à **CONSTITUTIONE UNIGENITUS** proclamationem , & provocationem *ad Universale Concilium* , ut fidem inveniret apud Eos , apud Quos Sacri Collegii Theologici Sorbonæ magnum semper , & gloriosum fuit Nomen. Neque quod temeritate vulgi ex lapsu privatorum toti adscribitur Ordini , Academicæ Sapientiæ fuit , nec esse potuit Judicium , nisi quoque Collegium Apostolicum ex defectu particulari quis ausit infamiâ notare ; nequii proinde funestus Mercurius Sacræ Nostræ Facultatis ità obtinere aurem , ut , qui alios Nuntiò suò reddidit attonitos , apud Nos suspicionem , imò iudicium falsi rumoris non subiret ; Quanta enim sint incrementa Gloriæ Sapientissimæ Sorbonæ , & Sacri Ordinis Vestri Celeberrima quidem & Antiqua , nunquam tamen antiquata , in Veritatis contestationem respiciantur tempora , revolvantur Acta , legantur Scriptorum Monumenta , Majorum , & Succedentium attendantur Testimonia , & his eruditus , compertum , probatúmque edicet , Sapientiam hic ità sedem fixisse , ut Emporium foret Literatorum , tantæque fecunditatis , ut Universitas Parisiensis multarum aliarum Universitatum esset Mater , gloriosos edens Partus , qui Nobilissimos suos Natales suspiciunt in Avitæ Sapientiæ Sorbona , & grata Veneratione complectuntur ; Hinc & Gloriæ sibi ducit Universitas Pragensis sub gloriosissimæ memoriæ Augustissimo **CAROLO** hujus



Nominis IV. Universitatem Parisiensem in Tripolim Pragenam ex parte Colonias duxisse ; quin imò & toti Ecclesiæ utilissima fuit , ut ità se non solum Sapientissimam , sed & Christianissimam comprobaret , quando non solum Doctores , sed & Sanctos educavit , & enutrivit. Exinde obligata est Sorbonæ Schola Subtilis , quòd Sanctum *Doctorem* habeat *Seraphicum* ; obligata est Schola Thomistica , quòd *Angelicum* suum nacta sit *Doctorem* ; obligatus est Religiosus Nostræ minimæ Societatis Ordo Inclytæ Sorbonæ , Quæ primos cum *Sancto Fundatore Patres* non finè Laureis Theologicis Sapientiæ gloriâ , & honore coronavit.

Ab sit itaque tam illustrem tótque Titulis gloriosorum meritorum incrementò Divinæ gloriæ , fidei salvificæ emolumento conspicuam Sacram Facultatem ignominie maculis , ceu ab Excelsis Majorum cogitationibus degenerem obscurari. Sacra Facultas , & facerrimus Ordo Vester gloriam suam , & honorem factis tuebitur ; Nos sermone gloriosis his facinoribus insistente in *Unitate Fidei* , & conjunctione cum *Authoritate Capitis Ecclesiæ* defendemus , ut dissipatis minùs rectè sentientium nebulis sua Claritas reddatur *Veritati* , & abolitis dissidentium nævis sua firmitas restituatur *Charitati*. Proinde corpore quidem divisi , Veritate tamen , & Charitate conjuncti pro Gloria UNIGENITI DEI FILII conspiremus , sub cujus gratiosissimis Auspiciis *Dogmaticum Sacræ Constitutionis Decretum* suum sumit exordium ; Conatus , & studia nostra in spiritu Veritatis , & Charitatis unita Divina Sapientia , quæ Fons , & Princeps Caput Argumentorum est Theologicorum (Theologia enim ex notatione Nominis Sui de DEO , & ex officio pro DEO loquitur) Principaliter largissima benedictione firmiora reddet , & in terris Divinæ Sapientiæ Vicarius CLEMENS XII. *Clementissimam* Antecessoris *Constitutionem* firmissimè Propugnantes , sanctissimè pro Utriusque Facultatis incremento benedicens , corroborabit , Sacro-Sanctum semper tenentes , & continuò retinentes , quod *Dogmaticè constitutum* est ; repetere enim crebriùs , quod rectum est , non est de Veritate liberare , sed , quod firmissimum est , affirmare , & confirmare.

Quòd autem intervallum Responsoriis ad Acceptissimas Nobis interpositum sit , erat , opinione Nostra , ex ipsa Voluntate Sacræ Facultatis , Cujus declaratione accepimus , omnibus suum innotescere velle salutare Decretum , firmamque de CONSTITUTIONE UNIGENITUS acceptance sententiam ; proinde ad mentem Sacri Ordinis , hanc pluribus Literatis Facultatibus communicatam volumus , ut , si fortè apud Quospiam sinisterior foret opinio , in reintegrationem Gloriæ plenè oblitteraretur ; atque ità Nostram , & plurium Aliorum præsentibus Sacræ Facultatis æstimationem manifestam manifestiùs consignamus. Insuper & typis mandavimus , ut impressius extaret , & indelebiter Integerrimæ Sententiæ perseveraret Monumentum.




Repetitis proinde Votis incrementa Divinæ gratiæ , & gloriæ , jugem prosperitatem , perennem splendorem , & Excellentiam sempiternam ex animo Facultas Theologica Pragensis Sacræ Facultati Parisiensi precatur , & comprecatur.

Datum Pragæ Pridie Kalendas Martii Annô reparatæ Salutis humanæ supra millesimum septingentesimum trigessimô primô.

**BERNARDUS RASCHDORFF,**  
è Societate JESU SS. Theologiæ Doctor , &  
Sacræ Facultatis p. t. Decanus.

**JOANNES BIDERMAN,**  
è Societate JESU SS. Theologiæ  
Doctor , & Sacræ Facultatis  
Senior.

**FRANCISCUS FERDINANDUS SCHWARTZ**  
de LAURO , Juris Utriusque Doctor , Universi-  
tatis Pragensis Syndicus , & Notarius.



*Cum Licentia Ordinarii.*

Reimpressum

WRATISLAVIÆ, Typis Academicis Collegii Societatis JESU.  
Annô M. DCC. XXXI.






Cam Licentia Ordinarii.



Biblioteka Jagiellońska



star0024675



